




羊城古鈔

二

ル 5
1519
2



門名6
1519
卷

川 5
1519
2

羊城古鈔卷二

順德仇池石秦山氏輯

山川

省會山脈

考禹貢載導山導水之文山之與水一氣流行不探山脈之祖無以知子孫之羅列而氣至水交之理亦茫如矣伏讀

國朝皇輿圖表一書首溯崑崙次記中國殆追源於羣山之所自出歟崑崙入中國分三脈其一為禹貢岷山之陽至於衡山又自衡山發

羊城古金 卷二
一
爲五嶺所謂衡陽爲五嶺之門而五嶺爲南
嶽之臂也由大庾嶺來盡於南海而融結於
羊城則是南海以庾嶺爲少祖以衡山爲太
祖也按五嶺之稱始自史記而五嶺之名則
首大庾裴淵廣州記云大庾始安臨賀桂陽
揭陽是謂五嶺顧或謂臺城之嶠在大庾騎
田之嶠在桂陽都龐之嶠在九真萌渚之嶠
在臨賀越城之嶠在始安乃去揭陽言九真
此又本諸南康記輿地記之說則是嶺之有
五廣東得其一廣西得其三湖南得其一若

據裴淵之說則廣東得其二矣所謂西自衡
山南窮東海一山之限別標五嶺其高而橫
絕者皆是也然五嶺之氣唯大庾先之而驗
諸廣西湖廣之水有交合於廣東而入於南
海者則始安臨賀桂陽揭陽亦僅作大庾之
臂指已耳夫秦關漢塞暑闕陽門銳嶠平臺
東偏第一其氣雄以健巒岈起伏噴奇石於
韶英發疊巘於三峽氣象萬千莫能名狀至
於中宿則有南北二禺南禺三十六峯北禺
三十二峯若相抱焉其北禺之山多聳絕嶮

而南禺之山則向南以之東於是奮而爲白雲逶迤綿邈有三十餘峯從之而行踰越數十里蜿蜒開合至於城北聳而爲粵秀落而爲禺又落而爲番則庾嶺千里之勢至珠江而氣止焉面水幾千頃對河南地五六十里左帶東江右襟南北二江交流匯集與潮汐呼吸相爲環繞至於菱塘大嶺綿亘百餘里而虎門獅石南岡等石爲門戶牂牁大洋中羣山拱揖者不可勝數夫豈僅羅浮抱其左西樵峙其右而已哉

白雲山 南越主山在廣州北十五里自大庾逶迤而來旣至三城從之者有三十餘峯皆知名每當秋霽有白雲翳鬱而起半壁皆素故名曰白雲其巔爲摩星嶺嶺半有寺亦曰白雲左一溪曰歸龍其上飛流百仞盤舞噴薄陳宗伯瀦以爲湖湖東北爲樓館十數所環植荔支梅竹林徑水石皆絕異黎太僕譬之仙女見人散髮垂腰而姿態自遠絕不染烟火之氣亦一說也月溪下有九龍泉流爲大小水簾志所稱重重

圭玉簾處其東南爲鶴舒臺安期昔上昇有白
鶴舒翅以迎故曰鶴舒又北一里有峯曰賓象
上有動石遊人叱之輒動前有泉因虎跑而得
甚甘其西南五里有太霞洞泰泉之水出焉故
有李忠簡玉虹飲澗亭小隱軒及孫典籍白雲
山房今皆廢又一里有洞曰玉虹其南曰聚龍
岡折而西有宋高宗御書閣又七里爲蒲澗水
安期舊居此始皇遣人訪之太白詩所云秦帝
如我求蒼蒼向烟霧是也記稱安期將李少君
南之羅浮至此澗采菖蒲一寸十二節者服之

以七月二十五日仙去今郡人多以是日采菖
蒲沐浴靈泉以期霞舉而宋時郡守嘗曠士大
夫往遊謂之鰲頭會云澗旁有寺曰蒲澗前爲
丹井水甘溫微有金石氣其陽有滴水巖水漑
微不斷無風則滴有風則不滴上有一石狀懸
鐘人至輒鏗然有聲其下又有水簾濺灑如霧
時大時小下注爲流杯池沿澗而南爲文溪爲
上下二塘至粵秀山麓則分流爲二右曰越溪
左曰菊湖又會東溪之水至此山下爲甘溪水
馳雪驟喧厯震山是曰聳聳水吳刺史陸亂唐

節度使盧均常疏濬以通舟輿傳云州治臨海
海流秋鹹亂畜水民得甘食是也均又築堤百
餘丈瀦水給田建臺榭其上列植木綿刺桐諸
木花敷殷艷十里相望如火僞南漢引以流觴
與宮人荒宴稱甘泉苑是山之勝尤在水其大
水凡二其源於月溪者爲溪一曰雙溪溪本一
而名曰雙以其上爲月溪而下復爲此溪也溪
上瀑布交流陳宗伯嘗築邀瀑亭焉其源於泰
泉者爲澗一曰蒲澗澗流爲溪者二而湖一

越秀山 省會主山亦名越王山通典南海有玉

山卽王字之譌耳山在城內正北聳拔二十餘
丈上有越王臺故址趙佗亦因山爲之唐韓愈
詩樂奏武王臺是也明永樂初都指揮花英于
山巔起觀音閣山半建半山亭都人歲時必登
遊焉劉龔時疊石爲呼鑿道沿道而登折而北
有歌舞岡卽尉佗三月登高處劉龔時夾道栽
花建樓觀於其上爲九日登高遊一名越井岡
前有古井鑿自佗時宋丁伯桂覆石開九竅因
名九眼井一名清泉今越井南衢猶以清泉名

番禺縣志

番山 在城內東南隅迤邐而北其上舊多木綿南爲郡學聖殿後北爲孔子燕居亭

番禺縣志

禺山 在番山北一里其上多松柏其陽曰西竺山在今城隍廟後番禺縣得名以二山也番山在南禺山在北相聯屬如長城然南漢劉龔皆鑿平之就番山積石爲朝元洞後改曰清虛又爲沉香臺觀於禺山上圖經曰番山在郡學後有亭焉禺山自譙樓雙闕連西竺山至元覽臺皆是也臺去禺山西北可一里方輿勝覽謂尉佗葬處蓋卽舊貢院地云

番禺縣志

按會城中故有三山其在番禺治東南一里者曰番山迤邐而北一里曰禺山其北曰粵秀昔人嘗以堯山及番禺爲三山與五嶺並稱今堯山莫知其處疑卽粵秀也三山之脈自白雲蜿蜒而來爲嶺者數十乍開乍合至城北聳起爲粵秀落爲禺又落爲番禺北番南相引如長城勢至珠江而止自劉龔鑿二山以爲宮闕而番禺遂平今郡學有小邱高僅數丈則番山之餘也禺山自譙樓雙闕連西竺至元覽臺一帶皆是登高望之猶見其

盤旋不斷迴抱三城之勢蓋司馬遷所謂番禺一都會劉安所謂一軍處番禺之都任囂所謂番禺負山險阻皆指此也番禺之名最古山海經云黃帝生禺陽禺號禺號處南海生徯梁徯梁生番禺番禺者賁隅也禺陽禺號者黃帝之庶子也番禺黃帝之曾孫也則番禺之名以黃帝之曾孫也若中宿之山曰二禺亦曰禺陽則以二庶子也然番禺之山又甚大山海經云桂林八樹在番禺東隅禺也又曰南禺之山鷓雛是出而羅浮記云羅

山之頂有桂所謂賁隅之桂賁番禺也則又以羅山爲番禺也今會城之禺山雖沒而自清遠至博羅謂皆禺山之所磅礴焉可也秦漢時以廣州之地總稱番禺當必有故不然城中之番禺二小山特培塿耳昔人合之以名廣州其義何耶番與賁同音潘禺與隅通作隅史記宅隅夷列子隅谷亦作禺禺之名惟廣州有之而說者謂番禺舊讀翻審故諺有云北人不識番禺南人不識盤屋然不知又何以讀番禺也山上有朝臺故址相傳臺象

北斗爲之圓基千步平頂三畝復道飛軒透
迤曲折是南越王朔望升拜以朝漢自稱蠻
巨大長老夫臣佗昧死再拜上書皇帝陛下
之處也南越志云熙安縣東南有固岡高數
十丈岡西面爲羊腸道尉佗登此望漢而朝
宗故曰朝漢臺臺從西歷番禺二山以上石
路紆迴廣州記以爲直峭百丈螺道登進是
也臺西有歌舞岡乃佗三月三日修禊之處
劉龔疊石爲道名曰呼鑾夾栽甘菊芙蓉其
間與羣臣遊宴又名此岡曰遊臺久廢今但

曰臺岡此三山之大槩也

又按番禺縣志有堯山在鹿步龍眼洞之東
海中崑然而高去城東北僅十五里又荊州
記云堯山赭巖壘起冠以青林高凡四千丈
自番禺迄交趾俱見之一名堯子峯昔人以
堯山及番禺爲三山竟莫知其處豈二書所
記之堯山或有不同與姑錄之以備考

坡山 在城內大市闌闌中向在江干相傳晉時
渡口故稱坡山古渡頭山本不高大復爲劉龔
所鑿竟成培塿其頂有丹竈其陽有穗石洞昔

有五仙人持穗騎羊降此故名又有一巨石廣可四五丈上有胼跡跡中碧水泓然雖旱不竭似有泉眼在下亦一異也按城中天然之石惟此餘皆客石

廣州府志

浮邛石 在城西一里相傳爲浮邛丈人得道之所古時浮邛在海中與海印海珠若離若合宋初有百二十歲老人陳崇藝言兒時見浮邛山足舟數千山四畔篙痕宛然今浮邛距水四里餘矣邛下有井葛稚川嘗飲之有海神獻珊瑚一株因名珊瑚井井旁多葦蕒草三月上巳遊

人多往採擷前有館曰朱明館中有軒曰挹袖堂曰白雲宋經略蔣之奇所建蓋以浮邛在羅浮之西爲朱明門戶羅浮東有浮碇西有浮邛皆朱明之所從出入者浮山之來以羅山而定浮碇以始之浮邛以終之斯朱明之首尾也故觀曰朱明郭宏農詩左挹浮邛袖故軒曰挹袖白雲固爲羅浮之西麓而浮邛又白雲之西麓也羅浮之路自浮邛而始至白雲而中地道潛通無間遠近故堂曰白雲浮邛又白雲之門戶也明萬歷間學士趙志臯以謫宦至開浮邛大

社與粵中士大夫賦詩而範浮邱稚川二仙像
祀之以浮邱公與王子晉吹笙得仙又爲亭曰
吹笙而堂曰大雅樓曰紫烟軒曰晚沐於此地
一大開闢旣去人爲亭以留其舄至今百有餘
年矣荔枝梅竹之植手澤猶存區海目詩云林
裏時藏蓬島路城頭半出羽人家又云羽人家
在朱明口卻闢此邱爲戶牖又云此邱往時在
海中三山烟霧晴濛濛今日邱林帶城郭惟餘
海月一片挂長松邱前有撒金巷有謠云浮邱
叔浮邱丈人同一目撒豆成金人不知肩上珊

瑚擔一束相傳有二仙一老一少兩人一目彼
此扶挈而行居人遺以麥豆撒之成金視所荷
之薪則紅白珊瑚枝也老者浮邱丈人少者浮
邱叔也按列仙傳浮邱伯姓李氏不言浮邱叔
意丈人其卽伯與然浮邱伯班固以爲荀卿門
人服虔以爲秦時儒生高后時浮邱伯在長安
楚元王交嘗受詩於浮邱伯又遣子郢客與申
公俱卒業當時浮邱伯或與安期生爲友安期
生至粵而浮邱伯亦相從而至耶

海珠石 在越王臺南廣袤數十丈東西二江水

環之雖巨浸稽天不能沒語云南海有沉水之香亦有浮水之石謂此也相傳有賈胡持摩尼珠至此珠飛入水夜輒有光怪故此海名曰珠海浦曰沉珠其石則曰海珠云石上有慈度寺古榕十餘株四邊蟠結遊人往往息舟其陰端陽七夕作水嬉多有龍郎蛋女鱸魚酤酒零販荔支蒲桃芙蓉渠素馨之屬隨潮往來遙望是寺魚沫吹門蠓光次壁朝晴暮雨含影虛無恍惚若鮫宮貝闕而不可卽也

國朝以海防至計因壘築爲炮臺雍正九年布政

司王士俊按察司黃文偉糧道陶正中鹽道馮方捐俸在得月臺上建文昌閣層樓聳峙可

攬山海之勝

南海縣志

海印石 海印沉石也在下方之東半出波際其上有京觀樓周以雉堞視海珠浮邱隱隱若三台象然

席帽山 在城北雙井街以形似名高二十餘丈有南漢郊壇遺址明成化都御史韓雍立墩臺其上周六里其下卽蘭湖

番禺縣志

象山 在席帽山東一里亦以形似名

番禺縣志

馬蛟山 在象山北七里相傳有蛟化馬以惑人

故名通志云其下有蘭湖 廣州府志

馬鞍山 在城北五里秦始皇時占氣者以南海

有黃雲紫氣之異發人鑿之二十餘丈其鑿處

形凹似馬鞍故名相傳鑿時流血數日今名北

山 番禺縣志

鳳皇嶺 在城北馬鞍山聳秀如飛鳳 廣州府志

松柏嶺 在郡北馬鞍山之東 廣州府志

鴻鵠嶺 在郡北上塘村五峯騫翥如鴻冲霄 廣州府志

府志

麒麟嶺 望州嶺 俱在城北馬鞍山之東 廣州府志

飛霞洞 在鶴舒臺北一里白雲山半峭壁百仞

瀑布懸飛若珠簾然 廣州府志

棲霞山 在白雲山西南五里一名景泰雲峯山

泰泉之水出焉昔景泰禪師卓錫得泉故以為

名宋白玉蟾棲霞晚眺詩海岸孤絕處晴河露

遠汀潮花人面白山色佛頭青夕照雌黃筆秋

烟水墨屏天空杉月冷鶴夢幾回醒名勝記云

古有七仙人寺後發得石履二古鏡一宋紹興

間風雨山裂又得唐天寶時銅鐘并藏寺中 番禺

縣志

玉虹洞 在白雲山西南一里洞之南曰聚龍岡

宋紹興間崔與之流五羊居此有鶴舒臺及玉

虹洞詩 番禺縣志

亂石山 其陰為虎欄其陽為月溪山與白雲相

連一名紫雲洞亦名曰雲後峒唐杜審言詩漲

海積稽天郡山高業地相傳稱亂石圖典失其

事即此 番禺縣志

佛跡嶺 在亂石山東盤石中有佛足獅子像有

寺今廢 番禺縣志

真武山 通志在佛跡嶺東北唐開元中羽士林

福存建真武堂禱雨屢應 番禺縣志

七星岡 在真武山之南相對七小阜羅列如星

名勝志唐開元中羽士林雅存建有草堂通志

作林福存 番禺縣志

金鷲嶺 在城東北又名飛鴈嶺其山峻險中藏

羣峯下枕菱塘外接洋海明正統末鄉民立鎮

于此禦寇唐陳陶送次魯詩高臺贈君別滿握

軒轅風落日一揮手金鷲烟雨空即此 番禺縣志

博大山 在城東北四十里南海界下為銅鼎溪

今湮

番禺縣志

大橋山

在城東北其下有澗狀若巨象垂鼻飲

澗中

番禺縣志

萬松山

在城南二里近盧循故城其上多松舊

有乾明菴宋蘇軾題扁

番禺縣志

昭陵山

舊志南漢陵寢故名南有石人馬各一

在城東北

廣州府志

咸旗岡

城東六十里在南海廟前江中高可五

六丈全體皆石祀南海神則建旗其上

廣東通志

赤石岡

在魚珠西南五里其色如丹占氣者謂

其下有寶唐時扶南國人欲以萬金市之刺史

韋朗曰南州鎮山也弗許明天啟間鄉紳李待

問議建浮屠于其上以鎮州城水口上有佛寺

及文昌祠士人歲時會文於此

番禺縣志

魚珠石

在波羅廟西十里一名鰲洲

番禺縣志

盧堠石

在江濱相傳吳隱之與盧循交戰處一

名南箕臺

番禺縣志

雙女山

在郡城西十五里俗呼鳳山宋潘美伐

南漢次龍頭劉鋹遣使請和美挾使者亟渡諸

險至馬逕巖於雙女山劉鋹降即此

南海縣志

潯岡 古漢尋陜之地在郡城二十九里數十峯相連形如巨屏極高下爲沙貝村

南海縣志

石門山 在郡城西四十里兩山相峙呂嘉嘗積石如門蓋山川之會南北之要害處也漢樓船將軍楊僕討南越嘗駐兵于此得越船粟其前有控海樓元時建西華寺明嘉靖中毀寺改建晉刺史吳隱之祠山下有貪泉卽吳隱之酌泉

賦詩處

南海縣志

靈洲山 一名小金山在廣城西北六十五里高可十餘丈廣袤二十餘畝其下鬱水經焉蓋西

北二江之來粵會城先以靈洲爲砥柱次以海珠次以海印次以魚珠皆在水中央類爲地脈浮山所謂鰲峯是也而靈洲尤大山根如鼎足其西曰象嶺曰三台南曰鹿馬曰鉢孟北爲讀書岡上有寶陀院超然妙高二臺有蘇學士遺跡倫公以訓云嶺南英氣鍾於會城而秀發于靈洲其溢而出者爲珠海奇觀相望郭璞占之曰南海盛衣冠之氣蓋後千古而言益徵云靈洲以北一帶古謂肅連山其勢若斷若續春夏水溢與靈洲同一浮沉常欲遠于江岸者然臺

上祀坡公遺像山下東隅海面浮生坦畝紳士

公舉爲東坡祀田

南海縣志

西樵山 廣州有三樵曰東樵曰南樵曰西樵西樵者南海之望而東樵羅浮之佐也去廣州治西百餘里奇秀峭拔挹雲霄而上之望若青蓮之華而四面方正立皆內向諸峯大小相聯屬皆隱於削成之中又若芙蕖之未開然者山之東凡二十峯南十有五西十有八北亦十有八合爲七十二峯而以大科爲絕頂巖二十有一洞十其飛泉散出於諸峯間乍合乍分合者爲

卧泉分者爲立泉狀各不一凡泉三十有二其一在噴玉巖一在錦巖一在漱玉巖二在垂虹洞左右交流如雙虹下飲故曰垂虹又有二泉在雲谷谷中羣峯迴合勢若層城有白沙書院瀑布左右夾之合流行石上委曲數里從巖頂噴飛因名其下巖曰噴玉又有泉二在天峯左者曰左天泉右者曰右天泉合奔雲谷注於九曲之溪有二亭曰左瀑曰右瀑以收其勝其在廣朗洞口者凡作三級透迤而下冰轟雪吼倒射青冥勢益暴又一在水簾洞是曰水簾爲九

曲溪下流披灑壁間霏微若珠箔又一在雲端
村其曰瀉錢泉者從空細下傾擊有聲石薄巖
虛琮瑋相應亦一瀑布也其在碧玉洞者擘崖
而出橫直恒無定勢餘氣爲烟爲霧者冥濛竟
數十丈望之常若飛泉然蓋自噴玉巖至此爲
飛泉者十有三矣而以此碧玉之瀑爲最奇陳
中洲有壁立一片雪風含白雲端之句書于石
上是山固多泉諸飛泉外其迸出石間者或仄
或涌爲乳爲湯大瀾小淪無不極其變怪之態
盤舞噴噴薄響振一山蓋西樵一泉山也山中人

沿溪以居或截流爲湖或築壘爲塘於四十餘
里間以泛以漁隨舟所至蓋不知山在水中抑
水在山中矣山中又多平地可以種茶茶田中
有村十餘鷄犬鳴吠若近若遠杜鵑蘭桂之屬
掩萼含風花棧參差雲畦歷亂遊者往往迷路
南海 在郡城一百里浩淼無際東流閩浙南通
島彙潮源于東南大洋入于虎頭甲子二門以
達于斜西海其南則入于崖山故曰祝融之汪
南海也停水曰汪 廣州府志

海水 炎洲之水其邊大洋以北者清而紺邊大

洋以南者碧而黑西漲暴下則黃濁黃濁故淤泥壅積以成田碧而黑則性勁味鹹水鹵所生火膏所發鬻之可成鹽末故凡海水秋冬鹹而春夏淡鹹則益清見底諺云鹹水清淡水濁鹹水滿洋不如淡水一掬言淡者雖濁而可食也虎門外之水重鹹也虎門內之水輕淡也舟入虎門則低五寸出虎門則高五寸水鹹故有力也入夜則海水純丹火光萬里波浪乘風如千萬火山衝擊物觸之輒生火花鹹故生火也然海中生火亦常不必以鹹凡水中必有火也董子謂火至陽而有涼燄此涼燄也木華謂陰火潛然此陰火也邵子謂有溫泉而無寒火此寒火也而南海獨稱炎海者既接暘谷復邇扶桑其精氣與日相摩而生火故曰炎海也

按南海與會城相隔百里鹹潮少到唯西北江水繞城東流抵扶胥與東江合出虎門以入海故水常淡然隆冬久旱海潮間有至者故微鹹陸亂傳謂州治臨海海流冬鹹是也東江發源于惠州龍川之北經河源博羅東莞增江至扶胥黃木灣入于海

廣東通志

西江 西有三江其一爲灘一爲左一爲右右江
至潯而匯左爲一而右江之名隱左江至梧而
匯灘爲一而左江之名亦隱惟曰西江西江在
西粵爲三在東粵爲一一名鬱水唐志稱南海
名山靈洲大川鬱水亦曰牂牁江蓋東粵江之
大者無如牂牁故南海一名牂牁海牂牁者江
中兩山名左思云吐浪牂牁西江之水以牂牁
之山爲始以厓門之口爲終牂牁其亦西江之
岷山也又曰牂牁江卽今巴盤江黔之水惟此
爲大由滇阿迷羅雄徑廣南泗城田州乃至粵

自廣南以上皆崎嶇不通舟楫而唐蒙以爲一
奇欲從夜郎浮船制南越計亦踈矣光武時牂
牁大姓龍傳尹董氏與郡功曹謝暹保境爲漢
自番禺江奉貢蓋陸至廣南乃繇水道耳用兵
貴取奇道然深入人國其勢在分武帝攻南越
兵分五路其命馳義侯發夜郎兵下牂牁特以
爲奇耳正兵以下橫浦爲先下橫浦至番禺水
道平而徑故樓船先至尋陘

按西江發自夜郎盡納滇黔交桂諸水而東
長幾萬里然趨海之道苦爲羚羊峽所束咽

羊城古錄 卷二
喉隘小廣不數武霽雨時至則狂波獸立往
往淹沒田廬人畜民居城上南門且築三版
故老言伏波平定側貳築堤于其國使交水
不爲粵患自是交人恒虞泛濫賄粵吏去石
一版遂以我爲壑考水經注馬文淵積石爲
塘達于象浦蓋以防交水之患也文淵此舉
與史祿皆有功于粵粵之上游如淮如灘如
橫浦如牂牁皆湍急多石其可舟行者或皆
史祿所鑿不止靈渠自史祿鑿靈渠而兩伏
波賴之以下樓船唐蒙所以請從夜郎浮舟

直至番禺西浦者亦以祿嘗開闢此道云

南江 古瀧水一名晉康水其源出西寧大水雲
卓之山會雲河松抱坎底上烏之水至大灣又
會東水至德慶南岸入于西江西江之源最長
北江次之東江又次之南江最短然其水清於
西江西江歲五六月必暴漲瘴氣隨之而東而
南飲者腹脹惟北江絕清潮之力僅至中宿故
禺峽之水甘冽不減中泠流至羚羊峽外每厓
門潮至則截西江之水使逆流或半入於北江
而北江之水濁矣江間見泡沫色黑則知天將

寒風雨且至白則否西江亦然

北江 按舊志北江合湏武二水合流通志止云其水來自桂陽之武水考韶郡志湏水源出大庾嶺經烏逕入保昌南流至韶城與武水合漢征南粵樓船將軍入湏水卽此又載三瀧水一名武水源出湖廣莽山經臨武入樂昌縣西爲三瀧東流經縣治南又八十里經韶城西南與湏水合連州志湏水出中宿南注陽山合湏水出涯口合湏水東南入海是北江本湏武湏三水合流而下通志止載來自武水蓋未詳考也

舊志又載鬱水源于滇邕遵封川南合桂水湏水湏水入靈洲出石門經會城南東注扶胥入海考北江抵省故道初由胥江蘆包趨石門尙未與鬱水合迨蘆包淤塞下由西南潭趨石門始會鬱水合流後西南潭口再淤今由小塘紫洞入王借岡沙口趨佛山神安南注三山入海而江流之經省會者無幾矣年來王借岡沙口漸淤涸下至三家店倒流皆然每候潮長舟楫始便通行前志謂欲疏西南之沙以明畜洩之理今上溯西南故道及現經王借岡數處沙淺

羊城古蹟 卷二
皆宜亟爲疏通使江水常注不涸匪獨舟楫便利而省會形勝襟帶益固矣

南海縣志

廣州潮 以朔日長至初四而漸消以望日長至十八而消謂之水頭以初四消至十四以十八消至廿九三十謂之水尾春夏水頭盛於晝秋冬盛於夜春夏水頭大秋冬小故防倭者自清明前三日至大暑前一日謂之春汛春汛爲大以水頭故言大汛也自霜降前一日至小寒前一日謂之冬汛冬汛爲小以水尾故言小汛也漁者歌云水頭魚多水尾魚少不如沓潮魚無

大小沓潮者潮之盛也一名合沓水水之新舊者去來相逆故曰沓沓重沓也當重沓時舊潮之勢微劣不能進退魚去而復來故多魚大者始能乘潮故大沓潮者漁人所喜又粵人以爲期約之節

珠江 在城南五羊驛前石排湧出海中彷彿海上浮珠卽海珠石也受靈洲之水合鬱水之流自石門東南滙于白鷺潭過會城下東趨虎頭門達于海

廣州府志

白鷺潭 珠江上流二里有白鷺潭水大而深每

大風雨有白鷺浮出則舟楫壞丙申五月朔二
白鷺狀如小艇隨波下上時無風雨舟經此者
皆見以小銃逐之飛數百步没于水相傳黃蕭
養作亂船經此潭白鷺為之先導亦妖物云

鬱水 源于滇邕遵封川而南合桂水滇水湟水
即在靈洲出石門環城西南而東注扶胥入于
海 廣州府志

扶南水 在城西南十六里又西北三十里曰巴
由水此水在胥江蘆包出竟流至石門 廣州府志

荔支灣 在城西七里古圖經云廣袤三十餘里
南漢創昌華苑於其上今皆居民 廣州府志

柳波涌 在郡城西十五里又西南二十四里曰
奇堪涌又西南二十里曰大通港舟楫往來流
入于海轉南二里曰英護塘一名腰帶水 廣州府志

天生塘 在城北二十二里春溫冬涸歲旱禱之
輒應 廣州府志

拾翠洲 在會城西南三十里古有津亭陸龜蒙
詩云侯吏多來拾翠洲是也 南海縣志

龍湫潭 在天生塘東石壁數仞飛瀑懸瀉成潭
廣州府志

沉香浦 在城西北三十里石門之南晉廣州刺史吳隱之沉香於此浦昔無名自吳隱之投沉香其中浦遂得名浦亦幸矣沉香在隱之不如其在浦浦存則沉香長存士大夫有欲得沉香者其問水濱可矣自晉至今南海無沉香也有則唯浦中沉香而已矣 南海縣志

行文溪 在城北源出簾泉十道至番禺為甘水流入金鐘塘分上塘下塘今名廉平水疑即此 番禺縣志

越溪 在菊湖之右會東溪至北山下北津溪去邑城東北五里吳刺史陸胤以海水味鹹導以給民唐節度使盧鈞後加疏鑿以濟舟楫更飾廣廈為踏青遊覽之所旁水皆種木棉刺桐南漢廣之為甘泉苑苑中有泛杯池濯足渠避暑亭即今之聶聶水也 番禺縣志

菊湖 在簾泉之左舊有崔與之祠 番禺縣志
 虎跑泉 在鶴舒臺北一里因虎跑而得泉甚甘故名舊有崔與之祠 番禺縣志

甘溪 在越溪之上漢刺史羅宏浚嘗有人詣蒲澗得九節蒲忽大雨水漂去其後得諸靈洲水

上始知其相通云 番禺縣志

粵洲 在元覽臺西洲上有草堂臨白雲池今廢

番禺縣志

藥洲 詳見古蹟

仙湖 亦曰西湖在古甕城西僞南漢劉龔之所鑿也其水北接文溪東連沙澳與藥洲為一長百餘丈歲久淤塞宋經略陳峴疏濬之輦龔故苑奇石置其旁多植白蓮因易名曰白蓮池而湖亡其東偏今有仙湖遺里焉

芝蘭湖 南越志番禺有芝蘭湖廣州志謂湖在

雙井街其水常滙今堙昔傳有周姓者治園得斷石上有古詩云芝蘭生深林無人常自芳君子處階前明德惟馨香游魚勿置羅好鳥名鴛鴦微風動林岸此心共迴翔其下斷缺 廣州府志

貪泉 詳見古蹟

鳳水 在亂石山東二十里名為黃陂飛瀑源于昭陵山以勢若鳳舞從空而下故名 番禺縣志

銅鼎溪 在博山下南越志天清水澄見其鼎鉉唐刺史劉道錫過此遣人繫其耳而牽之耳脫而鼎潛入繫鼎之人耳盡痛民神之遂不復取

番禺縣志

波羅江 唐韓昌黎碑扶胥之口黃木之灣卽此
在南海神廟前嶺南海水之會也羅浮雖夜半
見日然在山嶺高處海隅卑下此獨見之若凌
空倒影光怪靈幻最爲奇觀 廣州府志

蒲澗 在聚龍岡北六里廣州志云澗水味極甘
冷異于常流又名甘溪澗傍有石名禹餘糧有
五色雀恒自羅浮來止于此澗中產菖蒲一寸
九節南越志云宋咸平中姚成甫于澗側遇一
丈夫曰此菖蒲安期所餌可以忘老倏然而逝

今俗以七月二十五日安期生上昇相率爲蒲
澗之遊履綦駢錯澗旁有滴水巖巖上懸鐘人
跡不至時鏗鏗有聲上有安期飛昇臺其下簾
泉出焉 番禺縣志

琵琶洲 在城東南三十二里江中高十餘丈上
有三阜形如琵琶明萬歷間于洲上建九級浮
圖屹峙海中名曰海鰲 廣東通志

朋泉 陳文忠以抗疏罷歸于城北白雲山築館
曰雲淙別墅中有鏡機堂寶象林無畏巖海曙
樓邀瀑亭餘簫閣清冷菴諸勝嘗榜少陵句于

門云天下何曾有山水老夫不出長蓬蒿識者
知其有憂世之心焉公以雲淙噴薄爲瀑布下
流其水湍激悍怒不可瀾茗一日摩挲巖石忽
有兩乳泉從指間噴沸而出甘冽清寒其中冷
之味公大喜謂斯泉有偶如賢哲之不孤生因
名之曰朋泉自公殉節雲淙淪淪於烟草矣
九龍泉 在白雲山下舊志安期生隱此無泉有
九童子見須臾泉湧始知童子蓋龍也又名安
期井泉味極甘烹之有金石氣泉流下爲大小
水簾洞 番禺縣志

泰泉 昔景泰禪師于城北棲霞山卓錫得泉泉
初湧時雙螭出焉明洪武初孫典籍築白雲山
房於其上香山黃文裕改建泰泉書院舊志李
忠簡有文溪小隱軒及泰泉時又有玉虹飲澗
二亭舊址名勝志曰景泰者六朝時僧梁大同
中居羅浮大石樓下常至山頂見池有蔬葉泰
曰此泉當通人境乃書偈投水流出王氏池中
因施其地爲寺刺史蕭登每召與語朝至此山
暮出羅浮云 番禺縣志

簾泉 在蒲澗東匯爲流杯池沿澗曲折而南爲

行文溪水流入金鐘塘注于粵秀山麓又東北與東溪水會注于江上有晉廣州太守羅尚壘石遊觀故址 番禺縣志

月溪 在亂石山下 番禺縣志

樵湖 西樵下有湖環山東南隨水勢曲折而成長亘六十餘里湛甘泉嘗標爲二十八曲與弟子掉歌其中昔人追和三章其一曰二十三泉一半飛飛爲大小水簾肥湖中盡是飛泉水曲曲隨舟上翠微山上有二十三泉皆瀑布也其尤大者水簾其二曰東北湖頭接白雲東南湖

尾大江分諸峯不在烟波外七十芙蓉總與君山四圍皆江水環有七十二峯若芙蓉注其跌故云其三曰芙蓉一朵一飛泉流作湖波蕩碧天廿八花灣行不盡江風吹上瀑花邊山上又有天湖方丈襄嘗畜三瀑布爲之亦稱三瀑布湖三瀑布者其一出大科峯北麓爲雙泉流至雲表村爲西竺泉注于寶鴨池乃爲瀑布而下其一出小科峯北麓合碧雲二泉注觀翠巖又合紫雲溪逕白山村伏虎臺乃爲瀑布而下其一出諸度坑歷銀瓶盤龍石而下又有二小泉

羊城古鈔 卷二
一出盤龍石側繞石泉書院門而東一出後岡
浮石並會東澗之水而入天湖天湖凡受大水
三小水二烟波浩淼望若無際流至山下復爲
湖下湖之水卽上湖之水也每當雨過輒有飛
魚挂林杪嘗人截湖口而取之湖口有方子釣
臺至今基址猶存人多垂竿其中

羊城古鈔卷三

順德仇池石秦山氏輯

祠壇

萬壽宮 在文明門外康熙五十二年正月興建
原廣南韶道署址恭遇

萬壽聖節

千秋聖節及元旦冬至令節文武官至此望
闕行禮

萬壽亭 在城西南水涯康熙四十七年建今圯
社稷壇 在城西二里康熙二十五年巡撫李士

槓檄縣查照舊址在廢藩草場空地建復每歲春秋仲月上戊各官致祭

風雲雷雨山川壇 在城南大忠祠西康熙二十五年巡撫李士槓檄行建復雍正八年改建東門外校場左圍以垣墻開設各門東門外為厨庫為牲房西門外為齋宿所南為正門每歲春秋仲月祭社次日致祭

先農壇 在東門外教場普濟院後雍正五年建壇後為堂二層祭用仲春亥日壇高二尺一寸寬二丈五尺壇後正房三間貯祭器農具西間

貯藉田米穀東配房置辦祭品西配房令看守老農居住藉田四畝九分在壇前壇廟藉田之外周以繚垣啟門南向

厲壇 向在城西北三里康熙二十五年巡撫李士槓檄縣在大北門外流花橋左側建復每歲清明日七月望十月朔請城隍神出主其祭榜無祀鬼神分祀之

都城隍廟 在藩司東明洪武三年詔封天下省府州縣城隍之神前用木主瘞神像守令新任齋宿于此致祭其制北為神宇南為拜亭亭之

左右爲齋宿所儀門之西南爲省牲所

風神廟 在東門外雍正十三年 勅建每歲春

秋仲月上巳日致祭

龍王廟 舊在巡撫署東轅門雍正三年建五年

奉 旨龍神散布霖雨福國祐民京師業經虔
供復造各省土龍神大小二像命守土大臣迎
奉因于是年遣韶州府通判陸柱國赴京恭迎
到粵奉祀乾隆元年改建于粵秀山麓歲春秋
仲月上辰日致祭朔望行香 一在靖海門外
海旁平南王建

天后宮 在在皆有而五仙靖海兩門內最爲雄
壯神莆田林氏女至孝能知禍福沒而祀之航
海者禱輒應自宋封靈惠夫人元封天妃明封
護國加昭孝純正靈應孚濟聖妃廣東新語天
妃海神或以爲大虛之中惟天爲大地次之故
天稱皇地稱后海次于地故稱妃或曰非也易
兌爲澤澤通于天故曰天澤以海爲大故曰天
池而兌爲少女故曰妃艮之男爲地公侯故兌
之女爲天妃迨

國朝康熙五十九年加封天后重修每歲春秋仲

月癸日致祭

南海神廟 在城東南扶胥之口黃木之灣廟中有波羅樹又臨波羅江故世稱曰波羅廟祀南海神按道書南海神姓祝名赤夫人姓翳名鬱寥韓愈以爲祝融南海之帝是也隋開皇中創建至今廟內祭碑林立韓昌黎碑在東廊宋循州刺史陳諫重書神自唐開元時祭典始盛册尊爲廣利王宋康定中加號洪聖王皇佑二年以儂寇遁賴神功加號昭順紹興七年加號威顯元至元二年加號廣利靈孚明洪武三年始

封南海之神

國朝屢遣官致祭重修封南海昭明龍王之神每歲二月上壬日致祭

考宋真宗時錫王玉帶至和元年加王冕九旒犀簪導青纈耳青衣五章朱裳四章革帶鈎鞞縉鞞素單大帶錦綬劍珮履襪內出花釵九株桂襪簪鑲署曰賜明順夫人明順者王之夫人皇祐所封號也元時數遣使奉錦旛銷金旛金銀香盒吳萊古蹟記廟中有玉簡玉簫玉硯象鞭林靄所獻銅鼓及真宗所

羊城古錄 卷三
賜玉帶蕃國刻金書表龍牙火浣布今皆不
存唯大小銅鼓尙留殿東西耳明洪武六年
賜黃金香盒重十六兩

達奚司空 在波羅廟中相傳波羅國賈舶泊此
一人攜波羅子二枚種之風帆忽舉衆置之以
去其人望且泣遂立化于山上後人漆其身加
以衣冠稱達奚司空祀于廟左又有謂奚爲達
磨之弟入中土死此爲神其像以真身瘞

洪聖西廟 卽南海神在太平門外第十鋪明嘉
靖十三年建

國朝康熙六年察院董篤行奉

諭祭二十一年禮部侍郎楊正中奉

諭祭有碑記

真武廟 吾粵多真武宮神像披髮不冠服帝服
而建元旗一金劔豎前一龜一蛇蟠結左右蓋
天官書所稱北宮黑帝其精元武者也或卽漢
高之所始祠者也粵人祀赤帝並祀黑帝蓋以
黑帝位居北極而司命南溟南溟之水生于北
極北極爲源而南溟爲委祀赤帝者以其治水
之委祀黑帝者以其司水之源也吾粵固水國

羊城古錄 卷三
也民生於鹹潮長於淡汐所不與鼃鼃蛟蜃同
變化人知爲赤帝之功不知爲黑帝之德家尸
而尸祝之禮雖不合亦粵人所以報本也或曰
真武亦稱上帝昔漢武伐南越告禱于太乙爲
太乙鑿旗太史奉以指所伐國太乙卽上帝也
漢武邀靈于上帝而南越平故今越人多祀上
帝而會城諸廟則以城西祖廟爲雄壯焉

觀音廟 在越秀山上詳見寺觀一在晏公街志
載在狀元坊悞明隆慶六年建

文昌廟 在惠愛坊卽桂香街口康熙二十三年

巡撫李士楨重修叅議蔣伊作碑記雍正七年
署巡撫傅泰布政使王士俊重修又於祠右買
地建揚化樓

關帝廟 在府治東禺山之麓每歲春秋仲月吉
日五月十三日各官致祭雍正三年追崇

三代奉祀後殿乾隆四年增致祭銀兩嘉慶三年
制臺吉大人以廟門尙隘遷建育賢坊舊提督
行臺舊址越三年廟成巍然宮闕矣

得勝廟 在小北門外有二庚寅歲平靖兩藩帥
師恢粵營札于此迨克廣州越二年壬辰平南

王建于左又一年癸巳靖南王建于右俱名得勝皆在白雲山前兩山之上祀漢壽亭侯

月泉廟 在馬鞍街內祀華帝像

三元宮 在越秀山右詳見寺觀

斗姥宮 神名摩利支天菩薩亦名天后花冠瓔珞赤足兩手合掌兩手擎日月兩手握劔天女

二捧盤在左右盤一羊頭一兔頭明總制熊文燦招撫鄭芝龍時使芝龍與海寇劉香大戰菩薩現形空中香因敗滅乃立宮殿于慶肇七星

巖以祀之而省城廟二一在越秀山麓一在東門外線香街

門外線香街

瓊花廟 在西城外十一舖明萬歷十八年建

藥王廟 原番禺縣治順治十一年平藩總兵都督吳進功建康熙二十五年修復縣署廟遷木

頭 五仙祠 在古藥洲後改祀于坡山詳見五仙觀

應元宮 在越秀山順治十七年平藩建

吳相公祠 在濠畔街相傳神姓吳行八浙之紹

興人明時客于越晨起見有人踞井上黑氣旋繞吳怪問之曰我司疫者凡飲此水俱斃踰七

日則無害矣言訖歛失所在吳於是晝夜守井有來汲者告焉或弗信則以死持之泊七日吳曰可矣然吾當先試之掬水而飲飲訖病死鄉人醵錢葬其所而祀焉或曰吳見鬼物以身入井救之

西王母廟 廣州多有祠祀王母左右有兩夫人兩送子者兩催生者兩治痘疹者凡六位蓋西王母弟子若飛瓊董雙成萼綠華之流者也相傳西王母為人注壽注福注祿諸弟子亦以保嬰為事故人民事之惟恐後壁上多繪畫保嬰

之事名子孫堂人民生子女者多契神以為父母西王母與六夫人像悉以紅紙書契名貼其下其神某則取其上一字以為契名昏嫁日乃遣巫以酒食除之

南粵三君祠 在城北鎮海樓東廊祀秦南海尉任囂南越武王趙佗漢中大夫陸賈今圯

南粵王廟 在城北一里上有尉佗樓後併入侯王廟

陸大夫祠 在乾明寺側即今光孝寺祀漢中大夫陸賈後併入侯王廟今改祀于鎮海樓

二孝子祠 在城西二里祀漢孝子羅威唐頌

虞翻廟 在城西北二里

孔孝子廟 在粵秀山祀孔聖聰今廢

秉正廟 在城東祀漢臣張買今圯

名德祠 在粵秀山北以古閣改建祀歷代名德

高固楊孚董正羅威唐頌疏源陳臨王範黃恭

凡九人後圯改爲觀音閣

二獻祠 在朝天街宋寶祐中安撫使方大琛建

祀唐相張文獻九齡宋相崔清獻與之也今圯

五賢祠 在粵秀書院西齋祀宋周程張朱五子

以鄉賢唐張九齡趙德宋余靖崔與之李昉英

明邱濬陳獻章湛若水梁儲方獻夫霍韜黃佐

海瑞龐嵩何維柏楊起元區大倫配

三賢祠 在東橫街祀周濂溪王陽明陳白沙三

賢

崔清獻公祠 在南海縣學內東南宋寶祐中奉

丞相崔與之春秋致祭

崔菊坡生祠 在蒲澗宋端平二年廣州士民建

周元公祠 向在粵秀山祀宋儒周濂溪先生明

嘉靖四年提學魏校歐陽鐸建奉以濂溪曾爲

廣東提刑以致思慕春秋致祭

國朝康熙二十六年巡撫李士楨改建清水濠五十五年復遷仙湖街

朱文公祠 原晦翁書院在西濠街仁王寺址明魏提學校改建

國朝雍正二年遷仙湖街

忠節祠 在備倭府故址明萬歷二十九年建祀宋臣李昉英春秋致祭

李忠簡公祠 在都司後街明萬歷中提學副使袁茂英建

按忠簡公又祀海珠慈度寺後人以公昔曾讀書其地卽以祀之也

大忠祠 在舊山川壇側今文明門外南隅本南園故址明嘉靖間御史吳麟建祀宋信國公文天祥丞相陸秀夫越國公張世傑有司春秋二仲上旬致祭後圯

國朝康熙十年番禺縣知縣彭勳重建顏曰正氣堂右爲臣範堂左爲遠風堂乾隆二十三年知縣彭科復增祀宋樞密使高桂吏部侍郎權禮部尚書徐宗仁吏部侍郎趙樵兵部侍郎茅湘

權工部侍郎馬南寶翰林學士劉鼎孫于東室
顏曰日星河嶽更新其祠焉

五先生祠 在大忠祠左祀明監察御史趙价翰
林典籍孫蕢給事中王佐洛陽長史李德翰林
待制黃哲以五先王會結社吟咏其地也

白沙祠 在粵秀山麓明成化中建奉翰林院檢
討陳文恭獻章春秋致祭後圯

國朝康熙二十五年李士楨檄縣修復改建仙湖
街

忠襄祠 在忠賢街右祀明僉事毛吉

文康祠 在城東仁壽里祀明少師梁儲今圯

文簡祠 一在天關書院一在小嶼洞祀明尙書
湛若水今圯

文敏祠 在越秀山麓祀明宮保尙書霍韜今圯

文襄祠 在西門外彩虹橋下祀明內閣大學士
方獻夫今圯

文裕祠 在粵秀書院東祀明宮詹黃佐

迂岡祠 在粵秀山麓祀明狀元倫文叙今圯

中大夫祠 在城內蘭湖里祀明贈湖廣叅政郭
大始今圯

永賴祠 在番禺縣治右原嶺東道廢地明萬歷

六年廣州耆民倡義捐金買建祀都察院副都

御史龐敏惠公尙鵬以報奏立條鞭之功也大

學士趙志臯題曰永賴

青蘿祠 在粵秀山下祀明主事王漸逵今圯

一山祠 在粵秀山東南祀明御史黎貫今圯

龐弼唐先生祠 在二牌樓奉明理學明賢曲靖

太守龐嵩其孫教諭暉因其講學之地建祠

汪公祠 在舊布政司儀門外祀明左丞汪廣洋

今圯

遺愛祠 在城隍廟東祀明巡撫楊信民後增入

僉事毛吉布政陳選陶魯配以知縣高瑤初啟

土獲孤忠大節四字石刻地中人咸異之祠今

圯

陽明祠 在朝天街舊北隅社學祀兩廣總督新

建伯王文成守仁春秋致祭

國朝康熙二十五年巡撫李士楨重修

報德祠 在府學右祀明巡撫潘季馴今圯

東所祠 一在城南外一在城西外祀明通政張

詡

吳公祠 在城南祀明總督吳桂芳今圯

穆侯祠 在仁壽里祀明番禺邑侯穆天顏今圯

玉笥祠 在舊番禺縣左祀明番禺邑侯張國維

今圯

毛蔡二公祠 在仰忠街明嘉靖初建祀明臣毛

伯温蔡經

國朝順治間總兵張國勲重修

忠勲祠 在忠襄里祀明浙右叅政陶成及其子

湖廣布政使陶魯嘉靖四十年敕建

蔣公祠 在南海縣學內明倫堂東南奉明南海

邑侯蔣棻春秋致祭

李公祠 在鹽倉街為明按院李時華建

陳尚書祠 在光孝街奉總督陳瑞為本坊紳衿

講讀之所

劉侯祠 在鹽倉街原正學書院為明南海邑侯

劉廷元建

韓公祠 在西樵山雲路村祀明總督韓雍以報

奏免通山茶稅

賢良祠 在東橫街雍正十一年建祀將軍蔡良

楊公祠 在賣麻街合祀巡撫楊宗仁楊文乾父

子紳士商民立

石公祠 在油欄門外海旁祀總督石綝紳商同立

曹先賢祠 在小南門內祀先賢上蔡侯曹邴乾隆二十二年建

烈女祠 在賣麻街徽人汪采玉僑居其女二娘父死母許字吳繼維年久未婚旋以貧不能育欲奪其志不從投井死徽人同立祠以祀

節孝祠 在石馬槽雍正二年建

忠義孝弟祠 凡三一在府學一在南海縣學一

在亞婆壙

雄鎮祠 在城西第二舖明萬歷三十三年居民請建以壯風水

三界廟 城西中炮臺上有新舊二廟廟中有神蛇人有爭鬪多向三界神乞蛇以決曲直蛇所向作咬人勢則曲背則直或以香花錢米迎蛇至家囊蛇而探之曲則蛇咬其指直則已有許愿者不還蛇則騰至人家索飲食又或有讎怨於神前書其人年生八字以碗覆之神前碗大小紛然無有敢動其一者

急脚先鋒廟 凡男女將有所私從而禱之輒得
響應以香囊酬之神前香囊堆積乞其一二則
明年酬以三四廣州在在有廟而城則拱北樓
上東旁及靖海門內諸處祀之新語謂男女至
酬以三四以今觀之亦未見其然

金花廟 一在仙湖街一在河南廣州多有金花
夫人廟夫人金氏女少爲女巫不嫁善能調媚
鬼神其後溺死湖中數日不壞且有異香里人
陳光見而異之偕衆舉殮忽有一香木女像容
貌絕類夫人者浮出人以爲水仙取祠之因名

其地曰仙湖祈子往往有驗明成化初撫軍陳
公爲之重建稱爲金華普主惠福夫人張東所
先生爲之題詩玉顏當日睹金花化作仙湖水
面霞霞本無心還片片晚風吹落萬人家嘉靖
初魏提學校毀其祠焚其像然人篤信于今立
金花會仙湖之廟頗隘惟河南一廟西沈鷺潭
前臨珠寺古木濃陰三面匝水每歲首夏神誕
報賽者烟花火炮百戲駢集歌舞之聲旬月未
已焉

學校

廣州府學 在內城文明門內宋慶歷中卽西城
番市舊孔子廟爲之熙寧間數遷徙紹聖三年
知廣州章棫徙於城東南番山下卽今學也熙
寧四年程師孟置學田乾道三年經畧使龔茂
建御書閣淳熙四年轉運使趙澣創亭齋泮池
淳祐四年經畧使方大琛建飛閣列文行忠信
四齋元至元燬後宣尉使呂恕余璉重修三十
一年提舉王獻熊炎等建養賢養蒙堂祭器庫
延祐五年監司卜天璋改創廟學東西齋泰定

元年憲使密蘭復建雲章閣明初征南將軍廖永忠重修關射圃宣德元年巡按御史金濂左布政使張渙修建殿廡正統三年提學僉事彭琉闢鹽倉餘地建解宇神厨庫房及省牲所會饌堂六年巡按御史宋良暹復關射圃仍建觀德亭景泰五年巡按御史楊進復建鹽倉地以廣學基天順二年知府李恕重建殿廡三年巡撫都御史馬昂創杏壇燕居亭於番山北七年提學僉事胡榮重修廟學成化三年叅政張瓚復關前街直抵南門幾二百餘丈徙射圃於學

西仍建觀德亭四年知府吳中創櫺星門及左右廟垣皆石之八年巡撫都御史韓雍重修露臺甬道護以石欄嘉靖十九年重修徙敬一亭於番山萬歷二十八年教授董應舉請於督學副使袁茂英重修殿廡亭閣及啟聖名宦諸祠復學西侵地建學舍廊射圃闢城爲正門顏曰文明南枕城濠環遶如帶

國朝順治十三年平藩尙可信靖藩耿繼茂總督李率泰巡撫李棲鳳知府黎民貴等捐修康熙十年巡撫劉秉權布政使徐坦按察使佟養鉅

知府汪永瑞等重修并建觀德亭於射圃雍正
六年布政司王士俊鹽法道黃文煒公捐養廉
銀重修大成殿及東西兩廡擴殿東地改建明
倫堂舊明倫堂易爲崇聖祠復修名宦鄉賢射
圃戟門及周圍垣墻又於學西地別闢一門橫
過櫺星門直出以便行人布政使王士俊有碑
記乾隆二十一年知府張嗣衍詳請撥項重修
南海縣學 在郡西南隅始附於郡學西廡宋改
建於縣東六十步後燬於火元徙建城西高桂
坊明洪武間闢東北民房以廣之始創饌堂又

展華子巷西南民居改門南向永樂七年建大
成殿復拓學後地創尊經閣及東西號舍景泰
三年以鹽倉街隙地易學東民房增建之天順
元年始鑿泮池跨以石梁護以石欄成化五年
易櫺星門柱以石嘉靖六年建聚奎樓于左屏
墻于前又易民居改遷學門之南萬歷三十四
年重建名宦鄉賢二祠於清獻祠後建敬一亭
於尊經閣前學左原有青雲路久爲居民侵沒
崇正七年修復舊址

國朝順治初尙耿兩藩克復廣州駐兵內城混居

學宮牧馬於兩楹之間基址漸失其舊春秋釋
奠之禮權於他所厥後嗣藩罪死藩兵盡撤北
歸文武衙門復居內城東爲民房西爲兵房學
宮左右多爲旗兵所居康熙二十二年稍拓其
地重修學宮但內地湫隘前門迫窄其故址未
能盡復雍正元年改啟聖祠爲崇聖祠七年復
建聚奎樓於是舊址盡復鳩工庀材學廟煥然
番禺縣學 在郡東門內初附郡庠西廡宋淳祐
元年知縣諸葛珏建於縣東南五里前俯大江
後提學李鑑攝帥事捐贍軍田四百畝以助養

士經畧使方大琮臨流築浴沂亭爲士子游息
之所後燬元至元三十年暫附南海學明洪武
三年知縣吳中建於郡東城外後展東城學遂
在城內卽今學所二十五年知縣高鸞教諭張
敬增修之闢射圃於學右建先賢祠於戟門左
永樂二十一年主簿奚琳重建明倫堂正統十
二年按察使黃翰重建尊經閣及號舍成化四
年知府吳中易櫺星門以石八年都御史韓雍
重修廟學及光風霽月亭宏治六年左布政使
馮俊增修十五年知縣趙繼宗撤而新之萬歷

二十四年知縣蔣之秀重修

國朝順治十六年知縣蔣如松修葺康熙二十三年知縣李文浩重修大成殿雍正元年改啟聖祠爲崇聖祠

書院 義學社學詩社附

粵秀書院 在正南門內鹽司街原鹽分司舊署康熙四十九年總督趙宏燦巡撫范時崇滿不及各官捐銀建雍正八年知府吳騫重修山長河南按察使沈廷芳有記

越華書院 在布政司後街乾隆二十年鹽運使

范時紀及諸商捐建范有記勒石

濂溪書院 祀宋廣東提刑周濂溪先生院舊在府城春風橋北元季燬明正統二年于藥洲之西奉真觀舊址重建成化七年重修建愛蓮亭于湖上嘉靖元年改書院爲提學道署遷于粵秀山下久廢康熙二十六年巡撫李士楨檄南番二縣改建于新城糧道舊署并奉王陽明陳白沙二位先生神位仍有書舍給諸生讀書

矩洲書院 在西門外明黃侍郎衷建與其弟聚講授于此黃宮詹佐有記

正學書院 在廣城鹽倉街初明知縣劉廷元講學于此今改祀廷元

崇正書院 在都府後街原西察院故址明正統二年副使林挺玉建

迂岡書院 在粵秀山下祀明諭德倫文叙子通政司叅議以諒建

白山書院 在城北明嘉靖二十四年巡按御史陳儲秀爲祭酒倫以訓建

慎德書院 在粵秀山麓霍文敏建後改爲祠
穗城書院 在城南龍藏街康熙二十二年督糧

道蔣伊建給諸生讀書鹽驛道楊佐國查撥毛張二尙書祭田共五十八畝零每歲辦祀先賢二尙書五先生外餘供師生會課之費雍正八年知府吳騫捐修

晦翁書院 在城西南隅西濠街卽仁王寺故址提學魏校改建

天關書院 在城東明湛文簡建龐弼唐主此講席

粵洲書院 在小北門內越井岡麓明成化二十一年黃畿築室讀書扁曰草堂嘉靖七年子佐

重建十二年巡按周煦建逸士坊于其南十四年巡按戴璟改爲書院中爲世祐祠今復修

泰泉書院 在城北棲霞山上明嘉靖二年黃文裕佐建

雲淙書院 在城東二十里白雲山之麓月溪之上明閣部陳文忠抗疏罷歸建此讀書用唐句爲聯曰天下何曾有山水老夫不出長蓬蒿內有邀瀑亭自書聯曰一音龍藏雨三笑虎溪風證法堂海曙樓山人崔如衡題聯曰大地星辰浮析木極天烟水接扶桑入爲餘嘯閣直指葛

徵奇題堂曰鏡機堂自書聯曰幾人能到此一榻對高眠山麓有泉味清冽名曰朋泉郡人黎美周爲之賦上爲無畏巖傍爲兼山草堂別爲象寶林自題曰松風句曲山中相柳浪藍田畫裏詩有湖曰寶象大數百畝每風起波濤蕩漾與簾泉爭響洵快境也自公徇節後日就荒蕪茲所存者僅故址耳

赤山書院 在赤石岡塔西明李尙書待問倚崖疊石築基建院後里老瘳像于其中祀焉

鎮海書院 在粵秀山下明王光祿漸達講學處

營道書院

在豪賢街明萬歷間按察徐用檢建

番山書院

在新城清水濠街康熙二十二年知

縣李文浩建

禺山書院

在府學後宋嘉定間建宋大夫梁百

揆講學於此有詩明為鄉紳會議公讌之所今

為禺山關帝廟碑刻猶存

龍德書院

在承恩里明萬歷十八年邑令馮渠

建

雲谷書院

在西樵山明尚書湛文簡建今改入

白沙祠

端州書院

在西樵鰲頭市孫郎登等重建督學

道何三省題文獻在茲四字

大科書院

在西樵大科峯下明尚書湛文簡建

御史毛鳳為立太史坊

石泉書院

在西樵山天湖北明大學士方文襄

建後改建于廣城西門外龜峯寺故址

四峯書院

在西樵山寶峯下明宮保霍文敏建

萬歷中併入西庄霍公祠

雲溪書院

在西樵山白雲洞本土七鄉里人新

建洞內有十八景各家新建極景至

義學

嶺南義學 在城南龍藏街康熙二十二年督糧

道蔣伊建給諸生讀書雍正八年知府吳騫修

珠江義學 在城南木牌頭康熙二十三年知府

劉茂溶建

南海義學 在西湖街雍正元年知縣宋瑋捐建

八年知縣劉庶捐修

番禺義學 在城東番禺縣學前雍正八年知府

龐嶼建

社學

南隅社學

西隅社學

西南隅社學

廣仁社學

朱明社學

養蒙社學

作德社學

崇正社學 俱屬南海

中隅社學 在明顯巷

東隅社學 在豪賢街

北隅社學

東南隅社學 在小南門

武林社學 在二牌樓 俱屬番禺

一德社學 在靖海門內

詩社

廣州南園詩社始自明初五先生越山詩社始自

王光祿漸達倫祭酒以訓浮邱詩社始自郭光祿

羊城古少 卷三

羊城古錄 卷三
三
渠王光祿學會訶林淨社始自陳宗伯子壯而宗伯復修南園舊社與廣州名流十二人唱和葉石洞云廣東好詩辭縉紳先生解組歸不問家人生產惟賦詩修歲時之會粵人故多高致乃爾粵詩自五先生振起至黃文裕而復興陳雲淙云太史公謂齊魯文學其天性粵於詩則有然矣歐楨伯云明興天造草昧五嶺以南孫蕢黃哲王佐趙介李德五先生起軼視吳中四傑及嘉靖時黃泰泉先生崛起南海其持漢家三尺以號令魏晉六朝而指揮開元大歷變椎結爲章甫闢荒蕪穢於炎

微功不在陸賈終軍下也歐楨伯與梁蘭汀李青霞黎瑤石皆泰泉門人其詩正大典麗澤於風雅蓋得其師所指授楨伯蘭汀常以詩盛稱京師于鱗元美輩欲連爲八才子旋以八才子中粵居其二心嫉之且楨伯又非甲科乃舍楨伯王敬美云嶺南故多嫺於文辭而歐先生爲最俯一第不足拾取竟以常調爲文學掌故故事掌故歷郡國學卽止不復遷歐先生所歷皆上考遂破格入選爲國學掌故居久之將選入中秘弗果已遂遷爲廷尉平上下百年內除廸功繇廷尉平左遷博士歐

先生錄博士右遷廷尉相望兩人耳夫物不有以少爲貴乎自先生用掌故得廷尉平天下以爲少而貴之其學無所不窺而比事屬辭壹稟於古直溯建安大歷而上之而元美則謂瑤石五言古自建安而下逮梁陳靡所不入和平麗爾七言歌行有盧楊沈宋之韻近體颯颯全盛遺響誠徵其辭而奏之叶以正始鏗然而中宮商益十得八九矣知言哉瑤石後有區海目者直追初唐置大歷以下不復道論者謂明興前後七子稱詩號翰林爲館閣體海目始力祛浮靡還之風雅其前使後使二集雖使燕許復生亦不能有所加損其論詩有云宏正間力驅宋元還之古始合者什一近世求多於古自用我法未免恣睢於情之中而決裂於格之外按之而不合節歌之而不成聲其子啟圖亦云國朝之文章自北地以還歷下繼之盛於嘉隆而卽衰於嘉隆其病在誇大而不本之性情率意獨創而不師古遂使唐宋昭代畛分爲三聲氣之元江河不返此皆篤論也啟圖能承家學與李煙客羅季作歐子建鄜湛若四五公者唱和其雄才絕力皆可以開闢成一家而兢兢先正典

羊坊古錄 卷三
型弗敢隕越所著悉溫厚和平光明麗則絕不爲
新聲野體淫邪佻蕩之音以與天下俱變是皆嶺
南之哲匠也

坊表

惠愛 爲秦任囂趙佗漢吳恢吳陸仞鍾離牧晉
陶侃吳隱之南朝王琨蕭厲王僧孺隋劉公權
慕容三藏唐馮立王綝宋璟李商隱盧奐李勉
杜佑陽於陵孔戣鄭絀韋正貫盧鈞韓愈宋向
敏中李符邵曄陳世卿陳從易周敦頤魏瓘張
田王大寶龔茂良廖德明黃震蕭注曾逢龍明
楊信民王翺劉大夏王守仁彭遠陳員韜陳選
劉永清彭韶張□王溥鄭金陶魯李祥毛吉彭
琉宋端儀花茂聶好謙曹琚道同高瑤熊瓚蔣

昇王重丁瓚吳廷舉郭郁鄰建

忠賢 爲周高固漢鄧宓楊孚疏源晉王範唐何
昌期劉瞻何鼎宋李廷琚古成之馮元馬持國
黃勳吳英曾槐馬希驥温若春崔與之李昂英
馬南寶黃俊熊飛伍隆起明何真張度黎光孫
蕡黃哲陳璉周志新羅亨信陳敬陳諤李嗣盧
詳彭誼陳政陳獻章祁順黃皞張泰陳騏江源
張瓚梁儲張詡王鎮蘇葵倫文叙鍾善明建
孝友 爲漢董正羅威唐頌晉黃舒姚成甫張魴
南朝鄧魯庾道愍李冲唐鄧文進區册楊環張

鴻宋唐元廖喁霍暉王知梁觀國簡克已陳康
延劉慎劉鎔劉鐸錢益韓經張道貞阮與子李
用李春叟元陳韶孫單仲昇明簡祖英梁孟祥
黎貞蔣亞帑唐豫唐璧費希周翟溥福容悌與
陳觀黃瑜林光黃璉方用中陳猷吳龍陳護費
明黃畿阮珩梁惠生鄺達禮曹道隆建

熙朝元老 在忠賢坊爲邛文莊濬梁文康儲方
文襄獻夫立

父子及第 在貞烈坊爲修撰倫文叙編修倫以
訓立

父子會元

在忠賢坊為倫文叙倫以訓立

三藩岳伯父子忠勲

在忠賢坊後街為副使陶

成左布政使陶魯立

會元

在縣學左為宏治己未科狀元倫文叙立

狀元

在 為諭德倫文叙立

大司成

在承宣街為黃文裕佐立

榜眼

在承宣街為劉存業立

大學士

在忠賢坊為方文襄獻夫立

太宰宗伯

在大市街為方文襄獻夫立

青宮保相

在朝天街為尚書霍文敏韜立

黃閣宰臣

在西市街俱為少保方文襄獻夫立

柱國

在西樵山下為大學土方文襄獻夫立

碩輔名儒文章經濟

在朝天街為太子少保霍

文敏韜立

清朝柱石

在大市街為尚書何維栢立

尚書都憲

在南海縣治右為戴縉立

二部叅卿

在紙行街為侍郎黃衷立

大京兆

在西門內為府尹陳錫立

內臺總憲

在惠愛坊為都御史龐惠敏尚鵬立

兄弟進士

凡三一在貞烈坊為倫以諒以訓以

羊城古鈔

卷三

三

三城古錄 卷三
說一在忠賢坊爲陳麟陳密一在南濠街爲熊孟芳熊季芳立

會元宰輔 在承宣街爲大學士梁文康儲立

真儒 在承宣街爲檢討陳文恭獻章立

九牧書香 在詩書街爲林誠通立

盛世直臣 在忠賢坊爲右都御史海忠介瑞立

三達尊 在承宣街爲尙書湛文簡若水立

壬戌進士 在小市街爲郭棐陳俊等立

辛丑進士 在貞烈坊爲潘濬馮奕垣潘珙等立

甲辰進士 在承宣街爲李待問郭尙賓吳光龍

關驥等立

七宿經天 在承宣街爲黃士俊韓日纘等立

乙丑進士 在忠賢坊爲李覺斯梁士濟等立

戊辰進士 在忠賢坊爲梁衍泗等立

辛未進士 在承宣街爲劉士斗楊邦翰鄧務忠

等立

奕世台光熙朝人瑞 在承宣街爲內閣黃士俊

祖黃廷機父黃鎬立

亮天元彌聖朝碩輔 在承宣街爲內閣何吾騶

立

三城古鏡 卷三
總揆百僚承恩五代 在忠賢坊爲南吏部尙書

何熊祥立

三階復始六葉重光 在小市街爲禮部尙書陳

文忠子壯立

百歲恩榮 在忠賢坊爲歲貢封知府張繼先立

粵東正氣 在忠賢坊爲御史海忠介瑞立

太子賓客宗伯學士 在承宣街爲尙書王宏誨
立

兄弟進士 在仙湖街爲涂瑾涂瑞立

四海儒宗 在城北爲祭酒倫以訓立

挺秀 在石亭巷爲張瓚立

銀臺 在忠賢坊爲張翊立

逸士 在舊貢院右巡按周煦爲少詹黃佐父黃
畿立

百歲 凡二一在小市街爲番禺羅獻黎恒馬以

良崔珙等一在新店街爲僉都御史蒙詔母誥
封太恭人李氏立

進士同科 在承宣街凡四爲乙未戊戌庚戌癸

丑四科進士立

少師冢宰 在府學前爲大學士梁文康儲立

海濱鄒魯

在舊府治前爲歷科進士二百三十

三人立

進士 凡二一在仙湖街爲涂瑾立一在官渡頭
爲黃篋立

旌表貞節

凡三一在貞烈坊爲指揮王俊妻子

氏立一在蒲宜人巷爲陳恒慶妻趙氏立一在
右衛邊爲曾觀祐妻陸氏立

貞節

凡五一在資德里爲徐開母周氏立一在

桂香街爲尙崇恩母 氏立一在資德里爲金
有庫妻白氏立一在倉邊街爲舒尙孟妻殷氏

立一在大塘街口爲李天祐妻馬氏立

貞烈流芳

在大市街爲王命召妻滕氏立

已未進士

在承宣街爲陳子壯何吾騶黃應舉

夏樊學劉大臨關季益趙恂如朱昌祚謝雲虬
姚鈿吳羽侯立

父子存問

在承宣街爲大學士黃士俊立

癸丑進士

在承宣街爲王命卿俞士英吳殿邦

林聯綬李廷材霍化鵬梁夢環李孫宸崔奇觀
立

橋梁 附

越橋 在大市西街 大觀橋 在太平門西南

果橋 在南濠街俱宋景德經畧使高紳建

上古橋 在南濠街城邊龐景忠馮挺衝重建

西門橋 明嘉靖丁亥以石改建

太平橋 舊在城西廂康熙癸亥柝移青雲橋

普濟橋 明萬歷乙巳稅監李鳳以石改建

留虹橋 在西樵天湖右方文襄公建

彩虹橋 在城西接流花橋水出海知縣郭爾尼重修

七礮石橋 在華寧里街有大長七塊石古名華寧寶石橋水通清風橋大街溝渠而去

文溪橋 在楊都祠右宋李忠簡昂英建

仙童橋 在仙湖街自藥洲水至仙湖渠渠上有大石數塊古名仙童橋其水由橋下大渠水

流花橋 在北門外改民樂志喜橋 在城西叢桂坊

清風橋 在撫院東大街 春風橋 在武安街

萬里橋 在貢院前 迎恩橋 在正南門外

天字橋 垂虹橋 在城南

沙洲橋 在舊批驗所右 歸德橋

定海橋 在小南門外 東安橋

雙橋 在城東南 永安橋 在東濠口

順母橋 其故址在長壽巷 龍津橋 在荔枝灣

狀元橋在小北門內唐莫宣卿兒時居此景星橋在小沙河嘉慶元年建

慶雲橋在大沙河七八整七孔長七丈有奇廣可往來車馬嘉慶四年建費金盈千

寺觀

光孝寺 在城內西北一里本尉佗元孫建德故

宅三國吳虞翻謫南海居此廢其宅為苑園多

植蘋婆苛子時人稱為虞苑又曰苛林翻卒妻

子還吳施其宅為寺扁曰制止東晉安帝隆和

中罽賓國三藏法師始創為王苑朝廷寺又曰

王園寺劉宋武帝永初元年梵僧求那羅跋陀

飛錫至此始創戒壇立制止道場初師至此指

苛子樹謂眾曰此西方訶梨勒果之林也宜曰

苛林制止立碑預識曰後當有肉身菩薩于此

羊城西金 卷三
受戒梁武帝天鑒元年智藥三藏自西竺國携
菩提樹航海而來植于壇前誌曰吾過後一百
七十年當有肉身菩薩于此樹下開演上乘普
通八年達摩初祖自天竺至此唐正觀間改制
止王園爲乾明法性寺高宗鳳儀元年六祖慧
能與僧論風旛薙髮菩提樹下遂開東山法門
其後建風旛堂大鑿殿內鑿閣神龍元年西域
般刺密諦三藏于此譯楞嚴經宰相房融筆授
宋經畧使蔣之奇建軒曰筆授會昌五年改乾
明法性爲西雲道宮寶歷間建大悲幢五代南

漢鑄鉄塔二座于寺之東西宋太祖建隆三年
改爲乾明禪院徽宗改爲崇寧萬壽寺後又改
寺爲宮觀高宗詔改報恩廣孝禪寺後易廣字
爲光字苛林爲訶林元延祐間建齋僧大鑊明
洪武十五年始設僧綱司頒發印信置官正副
二員正統十年御賜大藏經十二函成化十八
年勅賜光孝禪寺扁額宏治七年僧定俊鼎建
四廊萬歷十九年修建敕經樓歐虞部大任輩
于西鉄塔旁開訶林詩社三十一年修復六祖
戒壇天啟六年募緣贖地一十四所創建禪堂

三座房廡十間并贖回伽藍堂五祖堂地修復

其古蹟見存睡佛閣唐神龍間建瘞髮塔唐儀鳳間建崇

正九年盧給諫兆龍重修增以石欄干繞之十

四年李象蒙建亭于殿左

國朝順治六年天然禪師開法于此重修睡佛閣

風旛堂勅經樓方丈筆授軒十一年因兵燹頽

廢東莞人蔡元正請平靖兩藩重建僧今釋碑

記田地塘稅三十五頃零光孝寺志

淨慧寺 在府西北半里梁大同三年廣州刺史

梁譽及僧曇裕建舍利塔曰寶莊嚴寺五代南

漢為長壽寺宋端拱中改名淨慧舊傳達摩曾

到僧堂一宿至今絕無蚊蚋塔後毀元祐中郡

人林修始重建千佛塔趙叔盜記塔高二十七

丈八稜九層掘地時古井九環列基外與丈尺

合復得古鼎藏劍三鏡一銛瑩如新瘞佛牙舍

利其下紹聖間蘇軾至顏曰六榕內有瀟灑軒

明洪武六年毀其殿廡創永豐倉惟存塔及觀

音殿八年住持僧愈堅重建佛殿改寺門東向

二十四年併入西禪寺永樂九年復還本寺匾

曰六榕廣人呼為花塔寺廣州府志

考寺舊有王勃碑今不可見矣永嘉禪師證
道歌一碑兩面皆刻字其碑陰讀之皆七言
歌詞文漫漶不完而上篆額皇宋廣州重開
永嘉八字亦似文未完者而字書勁逸亦似
坡公所書

懷聖寺 在府城內西二里唐時蕃人所創內建
番塔輪囷凡十有六丈五尺廣人呼爲光塔明
成化四年都御史韓雍重建以所留達官指揮
阿都刺等十七家居之相傳塔頂舊有金鷄隨
風南北每歲五六月蕃人率以五鼓登絕頂呼

號以祈風信不設佛像惟書金字爲號以禮拜
焉洪武二十五年七月金鷄惟颶風所墮送京
貯內庫復以銅易之亦實于颶風萬歷庚子重
修易以葫蘆康熙八年復墮于颶風

廣州府志

海珠慈度寺 舊在城東五代南漢大寶間始創
歲久圯宋寶祐中郡人李忠簡因讀書海珠登
第後捐貲與僧監義徙創於此仍以慈度匾之
侍郎王埜書額寺內有文溪祠

番禺縣志

考寺碑有刻觀音像一一唐吳道子作上有
正書摩訶般若波羅蜜多心經一題有明萬

歷丁亥年造亦皆泐不可辨上有慈聖宣文
明肅皇太后之寶可辨

寶陀寺 在鬱水之心靈峯之頂寺有寶陀佛因
名焉晉郭璞題南海盛衣冠之氣卽其地也又
名靈洲山寺明成化間太監韋眷重修內有大
雄寶殿金剛殿望氣樓妙高臺環翠亭宋蘇軾
謫惠州時維舟於此感夢題詩於此石刻詩存
係元南海縣尹張拱辰摹本粵人因瘞像祀之
遂呼其山爲小金山山下有超然堂爲仕宦往
來賓餞之所 寶陀寺志

解院寺

在棗樹街

南海縣志

西禪龜峯寺

在城西四里殿後石形如龜故名

明提學魏校改建大學士方文襄祠 國朝兩
藩毀祠爲寺顏曰西禪總督李棲鳳有文記之
又創萬佛樓 南海縣志

西華寺

在石門明成化八年都御史韓雍建內

有刺史吳隱之祠龐惠敏尙鵬匾曰清風萬古
萬歷甲午重修郡人袁昌祚記 廣州府志

大通古寺

在大通滘口五代劉晟時名寶光寺

達岸禪師住此化去有肉身祈禱輒應宋政和

六年經畧使覺民題賜大通慈應禪院明萬歷六年大旱衆僧迎師肉身至訶林禱雨隨降復欲迎回本寺輿重舉之不動日久寺廢其地爲豪右所據 國朝康熙六年郡人蕭子奇禱師發願罄家贖地建復鳩工庀材修築仍另買田地基塘五十五畝週圍植樹千株遂重興迎師復焉 廣州府志

長壽菴 在城西南五里舊順母橋故址明萬歷丙午八月巡按沈正隆初至得疾士民爭走神祠祝釐僧爲誦觀音救苦經數日御史夢見一

白衣婦人翼蔽而前詢云來自城西疾遂瘳因卽舊地恢拓鼎建慈度閣以奉大士餘爲妙證堂臨漪亭左右禪房悉備地可八畝同知魏伯麟知縣劉廷元益以白雲廢寺田四十三畝一分俾守香燈遂成名刹云沈御史有碑記今改名長安寺

祇園菴 在城西龍津巷

種福菴 在西門外積金巷

華林寺 在城西南一里梁普通七年西竺達摩禪師從本國來泛重溟凡三周寒暑至此始建

羊城古蹟 卷三
國朝順治十一年宗符禪師重修環植樹木蔚成
叢林

西竺新菴 在新城內南隅大新街尾

大佛寺 在南門右舊龍藏寺遺址後改爲巡按

公署康熙三年平藩建有碑記雍正十三年廣
州府劉庶重修

萬善寺 在觀音山明永樂初花將軍創爲觀音
閣萬歷間修復康熙五十四年粵海關韓繼嗣
重修

佛慧菴 在觀蓮街

成就菴 在西門外康公街

蒲澗寺 在府城北白雲山麓宋淳化元年建相
傳安期生以七月二十五日于此上昇粵人是
日悉往澗中沐浴以期霞舉內有蘇軾石刻七
言律詩一首舊刻已失明人劉介齡摹公字跡
勒石大學士何吾騶書額曰古蒲澗寺

白雲寺 在白雲山上今圯惟安期生祠存寺有
九龍井

東山寺 在城東明太監韋眷建成化間賜額永
泰璽書一道嘉靖十四年祀真武於前殿 國

朝順治七年總鎮班某重修知府王庭爲記

護國寺 在東門教場左明萬歷四十八年巡撫

孟宗文建

海光寺 在波羅廟左側古木叅天波濤與鐘梵
相應遊人往來不絕

濂泉寺 在蒲澗寺左飛泉百尺水響嵯峭間明

崇正間山人蘇秩秋建

月溪寺 在白雲山左前有文昌菴下有月池宋

紹興蘇太尉紹基建

海幢寺 在河南始爲郭家園僧池月建佛殿僧

今無改創大殿經閣方丈僧寮 國朝康熙十

一年平藩建天王殿巡撫劉秉權建山門宏殿

莊嚴爲嶺南雄刹後有鷹爪蘭乃郭園舊植也

地改而蘭仍茂以亭蓋之環以欄楯在崇蘭堂

前識者比之優曇花云二十五年從堪輿家言

改藏經閣爲後殿

龍果寺 在白雲山半宋運使陶定建軒曰千峯

紫翠亭曰天南第一峯方信孺詩危臺老石寄

層巔鶴駕逢迎不記年今日歸來應一笑山川

城郭固依然寺舊名景泰以梁景泰禪師卓錫

主功古錄 卷三
於此得名有僧歸亭至明與景泰年號符奉旨
賜額曰半山又名龍果嘉靖中黃宮詹佐改爲
泰泉書院移僧光孝寺萬歷三十五年僧正裔
於山椒卜地修復

新景泰寺 在白雲山恩光亭下明崇正六年黃
思巖捨地七畝叅議晏清建

西竺寺 在舊貢院西宋乾德元年僧永仁建明
成化二年韋內璫重建嘉靖三年改廓西文塲
移僧光孝寺

海鰲寺 在東南滉漚洲巽位上明萬歷中郭勲

卿棊王光祿學會倡議建九級浮圖以培通省
氣脈葺寺三座於前中爲知府戴燿生祠見置
香燈田八十三畝零

長春菴 在城東採監李敬建明萬歷三十六年
憲使汪改作南華廨院慈山禪師常駐錫於此
壽國寺 在教塲前明萬歷四十八年醫僧曇林
建環以碧沼松徑梅亭極爲幽僻崇正間僧元
象善醫爲時所重陳宗伯題曰能施無畏大學
士何吾騶書曰水月宮題詩二絕勒于石

永壽菴 在東山右明萬歷中制府戴兵憲馮助

建

東華寺 永勝菴 蓮池菴 俱在東門外

白衣菴 在小北門明萬歷庚子知縣黃鰲建

蓮花菴 在小北門外

永慶菴 在大北門外

接引菴 水月菴 淨土菴 俱在永安門外

彌陀菴 在粵秀山下

福善菴 在城東水關街明萬歷三十八年建崇

正間僧行儀住持大學士何吾騶題曰最上乘

諸名士詩人於月望日結放生社於此題咏頗

多順治壬辰都督吳進功重修

邏坑菴 在邏坑岡澗水滌流可坐石浮觴人競

遊之

覺悟寺 舊在烏龍山

廣果寺 舊在城隍廟西竺山

千秋寺 舊在藥洲南

勝因寺 舊在白雲虎跑泉上

七仙寺 舊在白雲東北

乾明寺 舊在萬松山上蘇軾題其額

古勝寺 舊在白雲山下

龍藏寺 舊在南察院前

開善寺 舊在廣恩館遺址

九龍菴 在白雲山右

雲根菴 在白雲山最高處名摩星嶺之半山人

蘇秩秋建

悟性寺 在西竺明嘉靖三年併入光孝寺見存

田地一頃二十畝

雙溪禪院 在白雲山二水夾流中開放生池環

抱開豁孝廉梁朝鍾同山人蘇秩秋建

別峯方丈 在摩星嶺之左高曠幽奇山人蘇秩

秋僧通岸同建今圯

紫竹洞 在白雲山中多紫竹蘇秩秋與僧會徵
建

越秀山觀音閣 在越王臺上明永樂元年都指
揮使花茂建後改爲名德祠尋爲梵刹萬歷間
重修布政使陳性學記

清泠菴 在雲淙書院澄法堂門外陳宗伯子壯
建今圯

黃華寺 在東門外明崇正十七年甲申僧函可
買李家行祠建可後開法瀋陽

東林寺 在東門外教場原觀音堂順治十五年
平藩下官文天壽捐資重建

白雲菴 在平藩得勝廟後順治壬辰年平南王
建

無着菴 在小東門內外巷比邱尼今最募建今
最函是禪師妹名來機

獅子禪林 在新城西橫街

淨業菴 初地菴 俱在高第街

草屨菴 在城西六里明經李慧菴建

施水菴 在城北旁有井雙孔又名雙井菴

六祖寺 在安樂廬南

紅梨寺 詳古蹟紅梨墩

開善寺 在城北一里卽唐廣恩館故址

元妙觀 在府治西唐名開元宋大中祥符間改
天寶元正二年改今名內有衆妙堂蘇公像方
公祠宋季燬元大德中宣撫使塔刺海重修復
毀明洪武初征南將軍廖永忠新之十五年開
設道紀司萬歷二十一年道衆捐金募緣重建
玉皇寶殿三十年太監李鳳重修真武殿 國
朝康熙五年平藩重建有碑記田地塘虛實稅

一十四頃七十八畝三分二厘

五仙觀 舊在十賢坊卽今布政司地後徙他所
宋政和中經畧使張勵仍復舊址明洪武元年
平章廖永忠寓觀中誤烈薪火燬焉乃命高思
齊重建新之孫典藉蕢記十年布政使趙亨堅
以觀地爲廣豐庫乃改創於坡山禁鐘樓後塑
五仙像祀之歲久圯成化五年布政張瑄重修
朝雍正元年提督馮毅重修有碑記內有玉皇
閣五仙祠三元殿老君堂慈悲堂眞武殿文昌
閣洪聖殿金花廟孫聖殿關帝殿御風亭仙人

跡穗石亭丹井祖師壇

碧虛觀 在蒲澗滴水巖上上有安期生飛昇臺
煉丹井今圯

浮邱社 在城西門外一里舊傳周浮邱公會遊
其地晉葛洪煉丹於此有珊瑚井歲久沒爲民
居明萬歷八年大學士趙志臯由侍讀出爲清
軍使者詢得其實遂闢而拓之建朱明館以奉
浮邱葛洪二仙又建晚沐堂大雅堂紫烟樓聽
笙亭挹袖軒郡中詞人騷客觴咏其間至二十
九年督稅太監李鳳復闢地創廟宇改爲廣仁

觀貯道藏十二函計幅員三十餘畝

三元宮 在粵秀山之右晉南海太守鮑靚建名

越岡院明萬歷及崇正俱重修改名三元宮

國朝康熙四十五年左右鎮重修名斗姥宮

奉真觀 在古藥洲蓮池上宋經畧陳峴建奉五

仙明洪武三年改觀爲市舶公館五仙移祀坡山

郵政

育嬰堂 在城西第十舖康熙三十六年督院石

鹽院沈倡建置產育嬰至五十七年始廢雍正

九年清遠商人葉松雲呈復至督院鄂鹽道陳

定案興修頭門一間接嬰藥室門房三間廣仁

堂三間金花殿一間殿後乳房民房觀音殿一

間殿後又乳房三間竹徑生生堂三間池邊書

房二間乳房二十五間省城房租新寧新會清

遠田租新撥南海番禺花縣新會新寧官租及

公捐生息銀一千五百一十兩埠商每包加鹽

三城百金 卷三
一筋約羨一千五百兩每歲約共銀二千五百
二十二兩支給經費

養濟院 在東門外自明設院收養孤老盲疾今
奉收恤月給口糧現在瞽疾孤貧男婦四百三
十一名口給銀三百七十九兩二錢八分又批
恤一十七名口給銀一十四兩九錢六分

痲瘋院 在東門外現在瘋疾孤貧男婦一百七
十四名口給銀一百五十三兩一錢二分又外
江一百三十四名口給銀一百一十七兩九錢
二分又批恤三十三名口給銀二十九兩零四

分

長生局 舊志宋於光孝寺設局給貧民不能喪
葬者

惠民藥局 在城西北舊志明成化中建有醫生
掌之巡按李雲鴻設於大石街并設養生所
漏澤園 在大小北門外

義塚 一坐東門外走馬山又一坐東門外四馬
岡俱康熙二十五年撫都院李士貞買置二頃
共地九十八畝零共給價銀七十七兩零一坐
在東門外四馬岡康熙二十四年廣州知府劉

茂溶買置一坐東山一坐塘尾一坐北門外明
布政司姜一洪學道何三省糧道黃日昌買置
知縣朱光熙仍察各庄無主之棺給銀埋葬以
上地俱屬番禺

敦仁館 在五仙門外馬頭康熙五十九年紳士
鄧可鞞黎郎士黃文濤陳德龍等建又捐置南
番二縣各處義塚施棺并檢葬無主露骨雍正
十一年南海縣詳請資部給予好義可風匾額

瑩墓

南越武王趙佗墓 相傳葬廣州禺山自鷄籠岡
北至天井連山接嶺皆稱佗墓莫知真偽佗葬
時輜車四出不使人知其墓交廣春秋云佗生
有奉制稱藩之節死有秘異神密之墓是也吳
孫權嘗遣交州從事吳瑜訪之鑿山破石竟不
可得有鐫於蒲澗云山掩何年墓册行幾代人
遠同金紫氣近似石麒麟此真墓形勝云或曰
在悟性寺

任囂墓 南海尉任囂墓在南海縣治西北二里

三城古鏡 卷三
墓上舊有廟今亡今鎮海樓左但有三君祠一區祠囂及趙佗陸賈耳當始皇時南海尉屠睢以苛法鉗制越人越人不服乘秦人疲惰潛出奇兵攻之遂破五軍囂至撫綏有道不敢以秦虎狼之威復加荒裔於是民居稍稍安輯當是時秦北有蒙恬威讐漠庭南有任囂恩洽揚越而始皇乃得以自安其後項劉並起豪傑紛爭莫知所向而甘公乃教張耳曰漢王之入關也五星聚東井東井者秦分也先至必伯自甘公此說一倡而天下皆歸心漢矣囂亦善識天文

能知五星餘氣及越門爲南方偏伯之象卒教尉佗成其業故張耳之歸漢也以甘公而富貴數世尉佗之自立也以任囂而享國五言是皆以天文決之

楚塚 光孝寺後有楚塚宋時有發之得寶玉劍佩之類予疑楚塚卽任囂塚蓋囂墓相傳在南海治西北二里光孝寺正其地也

南越明王嬰齊墓 今失其處吳黃武中交州從

事吳琦

一作瑜

訪趙佗墓莫能得獨得王嬰齊墓

珠襦玉匣玉璽金印三十六銅劍三爛若龍文

玉匣金色後琦携劔經贛上飛入江水

劉龔墓 在番禺東二十里其地有南亭海潮圍繞中不過十餘里墓在北亭洲旁疑卽昌華苑地也明崇正九年洲間有雷出奮而成穴有農者梁父過而見之投以石空空有聲乃內一雄鷄其中至夜盡聞鷄鳴無恙於是率子弟以入堂宇豁然珠簾半垂左右案玉几備列有金人十二舉之重各十五六觔中二金像冕而坐若王者笄翟如后者重各五六十觔旁有學士十八以白銀爲之地皆金蠶珠貝所築旁有便房

當窗一寶鏡大徑三尺光燭如白日寶硯一硯池中有一玉魚能遊動碧玉盤一以水滿注其中有二金魚影浮出他珍異物甚衆不可指識田父先持寶鏡歸光動鄰舍亟撲碎之有一珠入夜輒作怪狀懼而棄之於是鄰人覺而爭往遂白邑令令亟臨其地一旦公私搜發無餘令得玉枕一金人四以歸玉枕作卧虎形長可尺許大小珠見風悉化灰土口含之而出乃得完好承棺有黃金磚四棺旣斧碎有懷其髮齒以出者所發隧道如城鞏高五尺二座深三丈一

碑當穴門中立辭稱高祖天皇大帝哀册文翰林學士知制誥正議大夫尙書右丞相紫金袋臣盧應勅撰並書其所爲大帝者崩於歲壬寅四月甲寅朔越廿四日丁丑號爲大有十五年葬於光天元年陵曰康陵蓋劉龔墓也

李子長墓 在西樵雲路村其碑曰明抱真先生李子子長之墓霍文敏公所書也子長順德人名孔修初赴省試以搜簡過嚴嘆曰此豈朝廷所以待士耶擲硯而去舊貢院右有擲硯亭常從白沙先生問學得無欲之旨操行廉潔人不

可得而衣食之布政使朱英餉米二十餘石固辭不獲乃悉舉所有瓶盎盤匱之屬以貯米才容二石許餘則不受遇空輒畫猫兒賣之毛骨如生鼠見卽走其山水翎毛亦精絕人爭寶重然皆不肯多畫平居大帽深衣入夜不解閉戶靜默人希見其顏面間出則市人環觀以爲異物舉止雍容擇地乃蹈遇雨輒拱手徐行人曰先生何不趨雨龍凍透衣矣曰前路豈無雨耶行益從容人皆笑之至今廣人言迂拙者猶曰子長子長云嘗詣縣輸糧令見其容止有異問

羊城古鏡 卷三
姓名弗答第拱手令叱之則再拱手令怒以爲不遜答之五竟無一言而出白沙戲之曰如何又兩手剛被長官答傳者以爲美談晚於道深造年九十餘無疾卒文敏葬之西樵稱曰白沙抗節振世之志惟子長不失或問子長廢人有諸陳庸曰子長誠廢則顏子誠愚矣今西樵人以祭於社爲社師

彭烈女墓 在廣州府大北門外百餘武烈女往爲某家婢色情婉美其主已許字儻某矣一夕欲媵之堅拒不可主乃逐儻以絕其意臨行有

言弗遜主怒撻之數百肩背流血烈女遂自經死前謂儻曰儻某受大杖凡以我也我食主與母十餘年矣顧義有所不可言短而深主懊悔無極葬之郭外番禺令馮渠表其墓銘曰夫爲人奴儻乃婢子儻主不能儻則當死

仙人墓 在河南小港村口今已毀石亭故址猶有斷柱存在旁仙人不知其名與何代人相傳爲仙人墓云

漢太守鄧宓墓 在城北馬鞍山相傳漢伏波將軍馬援常駐兵於此山每風雨晦冥常聞人馬

之聲跡之乃得鄧宓墓藜葬中

漢徵士董正墓 在縣東今不知所在張翊集古
弔之云重岡如抱獄如蹲碧水春風野外昏不
覩碧林依玉樹間看遊騎過平原東方近墓吹
芳芷夾道踈槐出老根無限別魂招不得斷雲
含雨入孤村

漢孝子羅威墓 在縣東北黃陂堡羅山上有石
十餘丈形如鷄籠下有巖可坐三五十人南齊
刺史范雲嘗祭之

宋太尉蘇紹基墓 在白雲山紹基開建月溪禪

寺捨田以供香燈卒葬於寺後

宋恭人李氏墓 在何大山宋何世忠妻開寶間
出粟餉軍勅封恭人給賜山田以葬陳白沙以
詩吊之葉春及謂窮鄉寡婦禮抗萬乘名顯天
下詎不偉歟其子孫今居順德羊額增城新塘
明祭酒黃文裕佐墓 在棲霞山書院之下諭賜

祭葬

明王將軍墓 將軍名興字電輝爲明虎賁將軍
皇清平粵興堅守文村年餘不下糧盡闔室自焚
當事憐之葬之河南南箕村題其墓曰明虎賁

將軍晉封縣伯電輝王公偕元配張氏夫人暨同節十五夫人之墓

明莫以寅墓 以寅字休倩新會人少穎悟博聞爲人豪宕自喜至性過人篤於君親朋友義之所在不避險艱餼於宮墻聞寇陷京師爲書訣父閉閣自經其叔救之復甦遂棄諸生遊閩越吳楚之間歸寓番禺卒時年三十二其友昆陵張處仁等葬北門外

明司綵女官陳氏墓 勅葬陳家林在河南鳴墩李忠簡夫人墓 在番禺河南沙頭獨孤社旁

提刑譚惟寅墓 在番禺粵臺東廣果寺後

贈太子少保尚書霍華墓 賜塋於南海西樵山

雷壇峯尚書湛文簡稱其五善見懿德裕後碑知府龐弼唐墓 在西樵祥雲峯雲谷書院白沙祠之上尚書何維栢撰碑文

素馨斜 在廣州城西十里三角市南漢葬宮人之所也有美人喜簪素馨死後遂多種素馨於塚上故曰素馨斜至今素馨酷烈勝於他處以彌望悉是此花又名曰花田方信孺詩千年艷骨掩塵沙尚有餘香入野花何似原頭美人草

風前猶作舞腰斜

按鈕玉樵觚賸載珠江南岸行六七里爲莊頭村家以菀素馨爲業多至一二百畝昔南漢劉鋹有美人小字素馨者居此故其植獨繁而芬芳酷烈亦勝他所花時珠懸玉照數里一白是曰花田南海布衣岑霍山詩珠江南岸晚雲晴處處桑麻間素馨燈事尙傳遊子艇墓田曾誌美人銘迎風暗入秋衫膩籠月微聞夜夢醒腸斷賣花聲去後當年朱戶已長扃此與前說互異然考之各志當以前

說爲是河南庄頭村其花較多者則後人之繁植也

花塚 明崇正間有名姬張喬死風流之士醵錢捧土葬之白雲山梅坳人致一花種其葬處得數百本五色相間爛然如錦與花田相望亦曰花塚

按張麗人蓮香集載冢去番禺縣治十七里由東門出山口轉北直行渡小澗折而西經蚺蛇坑過蘇庄度石橋再北轉西土名象坑小梅坳是也附近寶象林紫竹洞普賢庵雙

溪別峯諸勝俱堪眺咏蓋異境云

共塚 順治庚寅正月靖南王耿繼茂平南王尙
可喜兵入廣州屠戮甚慘城內居民幾無噍類
其奔出者急不得渡擠溺以死復不可勝計浮
屠氏真修曾受紫衣之賜號紫衣僧者乃募役
購薪聚柴於東門隙地焚之累骸成阜行人於
二三里外望如積雪卽於其旁築大坎瘞焉故
曰共塚亂定後延侶結壇設伊蒲之祭番禺王
孝廉有祭共塚文頗行於世

回回墳 舊志唐開海舶西域回教默德那國王

謨罕驀德遣其母舅番僧蘇哈白賽來中土貿
易建光塔及懷聖寺寺塔告成尋歿遂葬於此
按回回墳在廣城北門外建於唐貞觀三年
其墳築拱頂形如懸鐘人入內語聲相應移
時方止故俗呼爲響墳自唐迄今千餘年鄉
人敬畏不敢近墳樵採元至正間留薩都刺
十七家居粵看寺及墳明季命回教世襲指
揮駐廣州因是兵民日盛各姓每年必詣響
墳瞻拜誦經至今相沿不替而西域諸國服
其化每航海萬里來粵以得詣墳瞻拜爲榮

雖極尊貴者至此亦匍匐膜拜於戶外極其誠敬焉

